

LA SECONDE
LETTRE
DV CHEVALIER
GEORGES
A MONSIEUR
LE PRINCE.



A PARIS,
Chez IEAN BRUNET, rue neuue saint
Louys, au Canon Royal, proche le Palais.

M. DC. XLIX.

LA SECONDE
LETTRE
DU CHEVALIER
GEORGES
MONSIEUR
LE PRINCE



A PARIS
Chez JEAN BAPTISTE, au Salon de Peinture
L'Imprimeur, au Salon de Peinture
M. DE LUXE



LA SECONDE LETTRE DV CHEVALIER

Georges , à Monsieur le Prince.



ONSEIGNEVR,

I'auois creu que ma premiere lettre feroit quelque impression sur l'esprit de vostre Altesse, non pas à la verité par la force de l'eloquence, mais par celle du raisonnement. Je ne vous ay pas dit de belles choses, mais ie vous en ay dit de tres-bonnes; mes pensées n'estoient pas delicates, mais elles estoient iustes; & si mes paroles n'estoient pas douces, elles estoient veritables. Je ne me suis pas voulu rebuter par ce mauuais succez, & comme i'ay tousiours la mesme affection pour ma patrie, & le mesme respect pour vostre personne, i'ay repris la plume, quand i'ay veu que vous ne quittiez point l'espée, & i'ay voulu vous faire de secondes prieres, quand i'ay veu la continuation de vos premieres entreprises. Certes, Monseigneur, si dans le commencement de ces troubles, i'auois quelque raison de vouloir dissuader vostre Altesse de ces violens desseins qui vous ont armé

contre vous-mesme, i'en ay maintenant beaucoup
 davantage, puis qu'alors vous auez sujet d'esperer
 toutes choses; & qu'à present vous auez sujet de
 les craindre. Vous estiez en ce temps là dans l'a-
 bus qui a esté commun à toute la Cour, que dans
 trois marchez Paris seroit affamé, que le pauvre
 demanderoit du pain au riche, de la mesme sorte
 que le voleur demande la bourse au passant, que
 le peuple regarderoit le Parlement comme son
 bourreau, & qu'enfin il vous le liureroit pour vo-
 stre vengeance, & pour la sienne; mais voila dou-
 ze marchez passez, & Paris subsiste, le pauvre de-
 mande, & reçoit l'aumosne comme autrefois, le
 peuple regarde le Parlement comme son pere, loin
 de vous le vouloir mettre entre les mains, il expo-
 seroit mille vies pour luy, & feroit des vœux pour
 vostre perte, si elle estoit necessaire à la conserva-
 tion. Quoy Monseigneur, vostre Altesse ne scait-
 elle pas que ce sont les biens-faits, & non pas les
 mauuais offices qui gaignent les volontez, le peu-
 ple n'est pas extremement esclaire, mais il est sen-
 sible, il n'est point si stupide qu'il ne sache faire
 le discernement que les bestes mesmes font entre
 ceux qui leur donnent à manger, & ceux qui les
 battent. Vous auez vn armée de brigands, & de
 sacrileges, & le Parlement en a vne de gens qui
 payent, & qui ne font du mal qu'aux ennemis.
 Vous auez vne armée où il y a quantité d'estran-
 gers, &

gers, & celle du Parlement est toute composée de bons François. L'esperance du butin & l'impunité des crimes ont engagé & retiennent vos soldats. Le service du Roy, l'amour du Pays, & la discipline sont les chaines des nostres. Mais certes, il falloit bien que ceux qui composent les deux armées eussent du rapport avec les personnes pour qui ils combattent, vostre armée combat pour vn voleur, & pour vn estranger, & la nostre pour ceux qui font le procez aux voleurs, & qui sont les Peres de la patrie. Vous direz que ce n'est point Mazarin pour qui vous avez pris les armes, que c'est pour le service du Roy, & pour la manutention de son Authorité, contre vn Parlement rebelle: Mais comment le pouvez-vous qualifier de ce nom, puis qu'il ne demande que le retour de son Prince, & que ces Astres de la France ne peuvent souffrir qu'avec regret l'Eclipse de leur Soleil. Bien loin de tomber dans les espouuantables sentimens de l'Angleterre, ces Messieurs ne voudroient tenir leur Roy à Paris, que pour luy rendre les adorations qui luy sont deuës. Quand on leur enuoya dire qu'ils s'en allassent à Montargis, n'estoit ce pas la mesme chose, que si la hauteffe qui n'est pas plus infidelle que l'Eminence, eut commandé à ses sujets de luy enuoyer leurs testes! O que Mazarin estoit mal habile, s'il a creu qu'ils le deussent faire! O le meschant s'il a creu qu'ils ne

le feroient pas, puis qu'il ne pouuoit ignorer que c'estoit mettre le Royaume dans vn horrible combustion. Pleust à Dieu que vous eussiez pris la peine de lire leur Apologie, aussi bien que les libelles de la Cour, au lieu de l'artifice & de la complaisance de ceux cy; vous eussiez veu dans celle-là la verité sans desguisement & sans flaterie. C'est là que non seulement les bons esprits comme vous, mais encore les mediocres ont peu voir laquelle des deux armées combat pour le se ruice du Roy, & pour l'affermissement de son Authorité, quoy que toutes deux ayent de la ialousie pour ce tiltre, il ne scauroit legitimement appartenir à toutes deux, & c'est vne verité cognüe d'elle mesme, que le motif de l'vne, n'est que le pretexte de l'autre, elles crient toutes deux viue le Roy, mais si i'estois de la vostre, i'aymeroie autant dire, viue Mazarin. Car, Monseigneur, n'est il pas vray qu'estre Roy, n'est autre chose qu'estre absolu, souuerain, independant; & n'est il pas vray aussi que le Cardinal l'est, si bien que la raison d'Estat, n'est autre chose que son bon plaisir. Vostre Altesse à l'esprit excellent, elle l'a cultiué par la Philosophie, & n'aura pas grand peine d'adiouster la conclusion à ce Syllogisme. C'est dans cette equiuoque que l'on peut dire que le Parlementa pris les armes contre le Roy, les ayant prises contre Mazarin; il est vray qu'estant vsurpateur, il ne merite

que le nom execrable de Tyran. C'est contre son
 Authorité que nous auons pris l'espée, & par con-
 sequent pour celle de nostre Roy naturel, puis
 qu'on ne sçauroit ruiner l'Authorité de l'un sans
 affermer celle de l'autre. Encore vne fois, Mon-
 seigneur, ostez vous le bandeau de deuant les
 yeux, deffaites le charme, ne vous laissez plus se-
 duire aux illusions d'une fausse gloire, vous qui en
 auez tant acquis de veritable. Il ne vous sera pas si
 aisé de vaincre vos compatriotes que les estran-
 gers, & quoy que l'honneur accompagne ordi-
 nairement la difficulté, ils n'iroient pas de compa-
 gnie en cette rencontre; reservez vostre courage
 & vos cinq campagnes d'experience pour des vi-
 ctoires plus faciles, & plus glorieuses. Nostre ar-
 mée est plus grande que la vostre, & quand elle
 seroit deffaitte, nous auons une ressource de trois
 cent mille combattans à qui il ne faut ny monstre
 ny subsistance; les estrangers nous offrent du se-
 cours que nous iugeons superflu, & vous auez trop
 de lumiere pour ne pas iuger que l'Archiduc Leo-
 pold seroit bien aise de voir son vainqueur humi-
 lié. Ne luy donnez pas cette satisfaction, Mon-
 seigneur, & quoy que la crainte de la mort ne
 soit pas capable de vous faire changer le moindre
 de vos desseins, conseruez pourtant une vie si
 precieuse que la vostre, & pour qui nous appre-
 henderons tousiours quand vous l'exposerez

contre d'autres que contre nous. le concluray par
vn vers qu'vn Orateur adressoit à vn Prince ieun-
ne & ambitieux comme vous, *Nulla salus bello, pa-
cem te poscimus omnes*, & moy particulièrement qui
suis,

MONSEIGNEVR,

Vostre tres-humbles & tre-
obeyssant seruiteur, le Ch
ualier **GEORGE**